

Qaratsap aanaartoorneratigut timip ilaanik nukillaartoornernik nappaatillit siunner-filimik aaqqissuussaalluartunik aammalu ataqatigiissarneqartunik sungiusaanissanik ingerlatsinissani iliuusissatut pilersaaruteqarnissat pillugit Naalakkersuisut kingusinnerpaamik UPA 2016-imi Inatsisartunut aalajangiiffigisassatut siunnersuusioq-quneqarnissaannik siunnersuut.

(Inatsisartunut ilaasortamit, Inatsisartut Agathe Fontain, Inuit Ataqtigiit, saqqumiunneqartoq)

pillugu

Ilaqtariinnermut Peqqissutsimullu Ataatsimiititaliap

Siunnersuutip aappassaaneerneqarnerani

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Tillie Martinussen, Demokraatit, siulittaasoq
Inatsisartunut ilaasortaq Agathe Fontain, Inuit Ataqtigiit, siulittaasup tullia
Inatsisartunut ilaasortaq Jess Svane, Siumut
Inatsisartunut ilaasortaq Laura Tàunâjik, Siumut
Inatsisartunut ilaasortaq Ineqi Kielsen, Siumut
Inatsisartunut ilaasortaq Ane Hansen, Inuit Ataqtigiit
Inatsisartunut ilaasortaq Mimi Karlsen, Inuit Ataqtigiit

UKA 2015-imi ulloq 22. oktober 2015-imi siullermeerinerup kingorna siunnersuut ataatsimiititaliamit sukumiisumik misissorneqarpoq.

Siunnersuutip imarisaa siunertaalu

Siunnersuut aalajangiiffigisassatut siunnersuutaavoq, qaratsap aanaartoorneratigut timip ilaanik nukillaartoornernik nappaatillit sungiusaqqinneqarnissamik matumani ilanngullugu sungiusarnissamik pisariaqartitsisut siunnerfilimmik periusissiamik, pilersaaruserluakkamik ataqatigiissumillu ingerlatsinissamat kingusinnerpaamik UPA 2016-imi Naalakkersuisut saqqummiusseqqullugit peqquneqarnissaannik Inatsisartunit taperserneqarnissaq siunnersuuteqartup kissaatigaa.

Siunnersuut Inatsisartuni siullermeerneqarnera

Naalakkersuisut sinnerlugit Peqqissutsimut Naalakkersuisup akissuteqaataata saqqummiunneqartup saniatigut siullermeerinermi Partiit Siumup, Inuit Ataqatigiit, Demokraatit, Partii naleqqap aamma Atassutip oqaaseqartartuisa allakkatigut oqaaseqaataat saqqummiunneqarput.

Sungiusaqqittarnerup sunniutai pitsaasut ataatsimut isigalugu uppernarsarneqarsimasoq akissuteqaammi oqaatigineqarpoq. Innuttaasut napparsimareernerup sanngiillisimanerullu kingorna annertunerpaamik imminnut ikiorsinnaalernissaannut inuiaqatigiit pisussaaffigalugu sulissutigisariaqaraat sungiusaqqittarnerlu pillugu pitsaasumik ataqatigiisumillu neqerooruteqartarnissaq pingaaruteqartoq aammattaaq akissuteqaammi oqaatigineqarpoq.

Sungiusarneqarneq peqqinnissaqarfiup akisussaaffigaa, sungiusarnermilu attassiinnarnissaq kommuninit akisussaaffigineqarluni. Sungiusaqqittarneq pillugu inatsisiliortoqarsimanngitsoq akissuteqaammi ilanngullugu oqaatigineqarpoq.

Qaratsamikkut aanaartoorsimasunut imaluunniit qaratsamikkut taqqamik milittoorsimasunut sungiusaqqittarfissamut peqqinnissaqarfik piareersartoq akissuteqaammi oqaatigineqarpoq. Qitiusumik napparsimaviit tamarmik 2016-imi amerlanerusunik tagiartuisartoqalissapput pillorissaasoqalerlutillu. Angerlarsimaffinni ikiortit ikiorsiissutillu kommunit suliassaqarfigmaat akissuteqaammi oqaatigineqarpoq. Pineqartumi Naalakkersuisut kommunillu akornanni suleqatigiinnerup nukittorsarneqarnissaa pisariaqartoq Naalakkersuisut isumaqatigaat.

Akissuuffiup ilaannaa kommuninit akisussaaffigineqarmat kommunit peqataatinnagit periusissiamik Naalakkersuisut saqqummiussaqaarsinaanngillat.

Oqaatigineqartut tunngavigalugit siunnersuutip itigartinneqarnissaa Naalakkersuisut inassutigaat.

Siunnersuummi oqaatigineqartut innersuussutigalugit siunnersuut ilusimisut iluseqartoq itigartinneqassasoq Siumup inassutigaa.

Ataqatigiisumik pilersaaruserluakkamillu sungiusaqqinnerup ingerlanneqartarnissaa pisariaqartoq, matumani ilanngullugu sungiusarnissamut neqerooruteqartarnissaq, Inuit Ataqatigiit erseqqissaatigaat. Siunnersuutip akuerineqarnissaa Inuit Ataqatigiit tapersorsorpaat.

Sungiusaqqittarneq eqqarsaatigalugu maleruagassat nutarterneqarnissaat Demokraatinit qilanaarineqarpoq. Sungiusaqqittarnerup ataqatigiisumik ingerlanneqartarnissaa pingaaruteqarnerpaajusoq Demokraatit isumaqarput. Naalakkersuisut nutaamik

iliuseqarnerisigut peqqinnissaqarfiup kommunillu pisussaaffilerneqarnerisigut inatsisiliuunneqarnerisigullu siunnersuutip siunertaa naammassineqassasoq ataatsimut isigalugu Demokraatinit naammagisimaarneqarpoq taamaattumillu siunnersuut manna Demokraatinit itigartinneqassasoq inassutigineqarpoq.

Nappaammik eqqugaasut tamarmik sapinngisamik pitsaanerpaamik katsorsarneqarlutillu ikiorserneqartarnissaat Partii Naleqqamiit ersarissumik isumaqarfigineqarpoq. Matumani Namminersorlutik Oqartussaniit kommuniniillu. Pineqartumi isumaqatigiinngittoqartariaqanngitsoq Partii Naleraq isumaqarpoq, ataatsimullu isigalugu siunnersuutip akuerineqarnissaa tapersersorlugu.

Naalakkersuisunit sungiusaqqittarnermut nutaamik suliniuteqartoqalenera eqqumaffigineqaleneralu Atassummiit nuannaarutigineqarpoq sungiusaqqittarnermullu tunngasuni suliassanut ataqatigiissaarisooqarnissaanik Naalakkersuisut kommunillu kaammattorlugit. Suliniutinik aallartisaasoqarnera innersuussutigalugu siunnersuut itigartinneqassasoq Atassummiit inassutigineqarpoq .

Tamanna tunngavigalugu siunnersuut Ilaqutariinnermut Peqqissutsimullu Ataatsimiititaliami sularineqartussanngorlugu inassutigineqarpoq.

Siunnersuummik aappassaaneerinissaq UPA 2016-imut kinguartinneqarpoq, taamaaliornikkut siunnersuummik peqqissaartumik suliaqarnissaminut sungiusaqqittarnerullu aallunnerunissaanut ataatsimiititaliaq piffissaqarnerusinnaaqullugu.

Ataatsimiititaliap siunnersuummik suliaqarnera

Sungiusaqqittarneq pillugu inatsisip, periusissat, najoqqutassat anguniakkallu aammalu sungiusaqqittarnerup ataqatigiissaakkap amigaataaneri ataatsimiititaliamit maluginiarneqarpoq.

Periusissap imarisinnaavaa immikkoortumi pineqartumi erseqqinnerusumik maleruagassiortoqarnissaanik aammalu anguniakkat qanoq anguneqarnissaannik pineqartumilu matumani napparsimasut siunnersuummi immikkut pineqartut sungiusaqqinneqartarnissaannik tikkuussinissaq.

Sungiusaqqittarnermut sungiusaqqinnerullu ingerlanneqarneranut atatillugu akisussaaffik, suliassat sukumiisumillu ataqatigiissaarineq napparsimasup pisariaqartitai aallaavigalugit aamma, Naalakkersuisut kommuninillu nukissaat aallaavigalugit, matumani ilanngullugu nunatsinni atukkat pissutsillu aallaavigalugit inatsisitigut maleruagassiortoqarsimavoq.

20. maj 2016

UPA 2016/45
(UKA 2015/45)

Peqqinnissaqarfik sungiusaanissamik akisussaaffeqartoq sungiusarnermilu attassiinnarnissaq kommuninit akisussaaffigineqartoq taamaattorli ataatsimut isigalugu sungiusaqqittarneq taassumalu ataqatigiissumik ingerlanissaa eqqarsaatigalugu inatsisiliuunneqarsimanngitsoq akissuteqaammi allassimavoq. Akisussaaffinnik avitsisimanermut eqqaaneqareersumut akisussaaffiup ataqatigiissaarneqarsimanngitsumik suliarineqarsimanera napparsimasumut iluaqutaanngitsoq aammalu napparsimasup oqartussaaffiit arlaannut saaffiginninnissaminut nalornissuteqartarnera ataatsimiititaliamit maluginiarneqarpoq. Napparsimasup pisariaqartitai tunngavigalugit sungiusaqqinnerup pisarialimmik ataqatigiissaarneqarsinnaanera maleruagassiuunneqarnissaa pisariaqarpoq, taamaaliornikkut ataqatigiilissammata sungiusaqqinnerlu assigiiamik ingerlanneqalersinnaalluni.

Napparsimasunut qaratsamikku aanaartoornerup kingorna imaluunniit qaratsaminni taqqakkut milittoornerup kingorna kingunerlutsitsisunut sungiusaqqittarnissamut peqqinnissaqarfik piareersartoqartoq akissuteqaammi aama oqaatigineqarpoq. 2016-imi peqqinnissaqarfiup qitiusumik immikkoortuini tamani tagiartuisartunik pillorissaasunillu amerlanerusunik atorfinitsitsisoqassaaq. Angerlarsimaffimmi ikiorteqartitsineq atortorissaarutillu kommunit suliasarigaat akissuteqaammi aamma oqaatigineqarpoq.

Pineqartumi Naalackersuisut kommunillu akornanni suleqatigiinnerup nukittorsarneqartariaqarnera Naalackersuisut akissuteqaatiminni taperseraat ataatsimiititaliamit ilanngullugu maluginiarneqarpoq.

Amerlanerusunik atorfinitsitsinissamik suliniuteqarneq ataatsimiititaliamit iluarisimaarneqarpoq sungiusaqqittarnermili pisariaqartinneqartunut ataqatigiissumillu sungiusaqqittarnerup ingerlanneqarnissaanik pisariaqartitsinermut aaqqiissutigineqartutut naammaginangitsutut isumaqarfigineqarluni. Peqqissaanermut neqerooruteqarniaraanni kingornalu sungiusaqqinnissamut suliniuteqarnissamik sulisut piginnaasaqartuunissaat ataatsimiititaliap erseqqissaatigaa, taamaattumillu amerlanerusunik atorfinitsitsiniarnermik ilimasaarineq pitsaasup tungaanut alloriarnerulluni.

Qaratsap aanaartoorneratigut timip ilaanik nukillaartoornermik nappaatillit sungiusaqqinnissamik siunnerfilimmik, pilersarusiorluakkamik ataqatigiissaakkamillu matumani ilanngullugu sungiusarnermik pisariaqartitsisunut suliniutinik siammarterinissamut periusissiamik saqqummiussaqaarnissaq siunertaralugu UPA 2016-imut piffissaliisoqarsimanera siunnersuummi allassimasoq pillugu piviusorsioertutut isumaqarfigineqanngitsoq ataatsimiititaliamit maluginiarneqarpoq.

Ataqatigiissaakkamik sungiusaqqittarneq pillugu sukumiisumik maleruagassiornissamut piumasaqaarnissaq UPA 2016-imi inatsisiliornissaq illersorneqarsinnaanngitsoq ilanngullugu ataatsimiititaliamit oqaatigineqassaaq. Sungiusaqqittarnermut ataqatigiissaakkamillu

sungiusaqqittarnerup ingerlanneqartarnissaanut tunngatillugu inatsisinillu pingaarnersuiuermi salliutinneqarnissaat qularutissaagunangilaq, ataqatigiissaakkamik sungiusaqqittarnerup ingerlanneqarnissaanik qulakkeerinninngikkutta inuppassuit nukiisa annaaneeqartut saniatigut ullumikkut atukkat naammaginangillat amerlasuutigullu suusupaginninnerulluni.

Napparsimasut sungiusaqqinneqarnissamik pisariaqartitsisut peqqinnissaqarfiup, isumaginnittoqarfiup kommuninillu akornanni uteqattaartinneqartarnerat suusupaginninnerusoq ataatsimiititaliaq isumaqarpoq, taamaattumik matumunnga tunngatillugu piaartumik inatsisiliortoqartariaqarpoq, taamaalilluni ataqatigiissaakkamik sungiusaqqinnerup ingerlanneqartalernissaa pitsaasoq qulakkeerneqarsinnaaqqullugu. Matumani napparsimasut qaratsamikkut aanaartoorsimasut imaluunniit qaratsamikkut taqqakkut milittoorsimasut kingunerlutsitsisimasut siunnersuummi pineqarput kisianni napparsimasunut allanut sungiusaqqinneqarnissamik pisariaqartitsisut aamma pineqarlutik.

Nassuiaat

UKA 2015-ip ulluini kingullerni nassuiaat ima qulequtalik "Inunnut toqussutaasinnaasumik napparsimasunut suliniuteqarnek piginnaanngorsaqqinniarluni nipaallisaaniarlunilu (nipaallisaanermik iliuuseqarnek) periarfissat" ataatsimiititaliap Peqqissutsimut Naalakkersoqarfimmit tiguaa.

Sungiusaqqittarnek inunnut ataasiakkaanut inuiaqatigiinnullu pitsaasumik aningaasaliinerusoq nassuiaammi pingaarnertut oqariartuutigineqarmat ataatsimiititaliamit maluginiarneqarpoq. Sungiusaqqittarnermili suliaasaqarfiup ingerlallualernissaanut aammalu kalaallinut naleqqussarneqarnissaanut aporfupput maleruagassaqaqqinninnera sungiusaqqittarnermilu suliaasaqarfiup ataqatigiissaagaqqinninnera.

Sungiusaqqittarnermut tunngatillugu inatsisitigut sinaakkuteqaqqinneq

Inatsisitigut sinaakkutissap inissinneqarnerata saniatigut pitsaasumik aqqissuussaasumillu sungiusaqqittarnissap qulakkeerneqarnissaa siunertaralugu peqqinnissakkut politikkimi annertuumik Naalakkersuisut suliaasaqarput.

Inatsisitigut sinaakkusiussassat inissinneqarnissaasa saniatigut pitsaasumik aqqissuussaasumillu sungiusaqqittarnerup ingerlanneqarnissaata qulakkeerneqarnissaa siunertaralugu peqqinnissamut politikkimik Naalakkersuisut suliaqassapput.

Sungiusaqqittarnek Danmarkimilu sungiusaqqittarnek pillugu maleruagassat qanoq suliarineqarsimaneri pillugit 2015-imi decemberimi ataatsimiititaliaq Danmarkimut paasisassarsiorluni angalavoq.

Danmarkimi suliassaqarfik qanoq isumagineqartarnersoq ataatsimiititaliap matuma kinguliani naatsumik paasissutissiissutigissavaa.-

Nunanut allanut sanillersuuttakkanut sanilliullugu sungiusaqqittarneq pillugu Danmark kingusinnerujussuakkut inatsisiliorsimasoq ataatsimiititaliamut oqaatigineqarpoq. Sungiusaqqittarneq pillugu inatsisivimmik soqanngilaq, kisianni pisariaqartitsineq naapertorlugu sukut tamaana malittarisassiuunneqartarluni. Taamaattumik sungiusaqqittarneq tunngavigalugu inatsisita aalajangeruminaassinnaarpoq.

Taamaattoq sungiusaqqittarneq pillugu maleruagassat inatsisini makkunani takuneqarsinnaapput:

- ▶ Peqqinnissamut inatsimmi
- ▶ Sullissinissamut inatsimmi
- ▶ Suliffissaqartitsiniarnermi inatsimmi
- ▶ Ilinniartitaanermi inatsimmi

Sungiusaqqittarneq pillugu sukumiinerusumik ataqatigissumillu maleruagassat nalunaarutini ilitsersuutinilu atuarneqarsinnaapput. Ilaatigut naalakkersuisoqarfiit, immikkoortortaqarfiit akimorlugit ministereqarfiillu akimorlugit ilitsersuutit allassimasut innersuussutigineqarput:

Nunap immikkoortuini kommuninilu sungiusaqqittarneq sungiusarnermillu attassiinnarnissaq pillugit ilitsersuut (2014)

Ilitsersuummi oqaatigineqartumi sungiusaqqinneq aamma pineqarpoq. Peqqissutsimut Ministereqarfimmit isumaginninnermullu Ministereqarfimmit sularineqarpoq ilaatigut nassuiaatinik akisussaaffiillu immikkoortortaqarfinnut agguataarneqarnerinik imaqarluni.

Kommunit sungiusaqqittarnerat pillugu ilitsersuut (juni 2011)

Ilitsersuummi Ministereqarfiit akimorlugit pineqartut: Peqqinnissamut Ministereqarfik, Isumaginninnermut Ministereqarfik, Suliffissaqartitsiniarnermut Ministereqarfik aamma Ilinniartitaanermut Ministereqarfik.

Ilitsersuut kommunit sultanik aaqiiniarnerini tapertaassaaq, matumani ilanngullugit innuttaasut tamarmik ukiui, pisinnaasaat najugaqariaasii apeqqutaatinnagit, isumaginninnikkut-, suliffissaqartitsiniarnermi-, ilinniartitaanermi peqqinnissamullu tunngatillugu sungiusaqqinnermi eqqortumik sullinneqarnissaat qulakkeerneqassalluni, sungiusaqqinnermilu ataqatigiissumik suliniutit qulakkeerneqassallutik. Innuttaasut

ilaqutaasullu kommunit sungiusaqqittarnermut suliniutaat ilisimasaaqarfiginissaat ilitsersuummi aamma siunertarineqarpoq.

Ilitsersuummi malittarisassat, sungiusaqqittarnerup siunertaa, sungiusaqqittarnerullu ingerlanerani suliniutit nalinginnaasut, soorluttaaq immikkoortortaqaarfiit kommunillu sullissivii akimorlugit suliat allaaserineqarput.

Taamaattumik ilitsersuut allagarsiivittut aamma atorneqarsinnaavoq, innuttaasunut ataasiakkaanut suliniutinik sullissiviit immikkoortortaqaarfiillu akornanni ataqatigiissaarinermi atorneqarsinnaalluni.

Isumassarsianik allattuivimmik – “immikkoortortaqaarfiit akimorlugit sungiusaqqittarnermut suliniutinut periutsit pitsaasut” Ilitsersuutip peqatigisaanik Nunamut Namminermut- aamma Peqqissutsimut Ministereqarfik tamanut saqqummiussaqaarpoq. Isumassarsianut allattuiviup immikkoortortaqaarfiit akimorlugit sungiusaqqittarnerup ingerlanneqarnissaanut atatillugu maligassiuineq pitsaasoq allaaserineqarpoq.

Ministereqarfiit akimorlugit ilitsersuut isumassarsianullu allattuivik ataatsimoorussaqaq nukittorsaaqqinnerup ingerlanissaata ataqatigiinnera ataqatigiissaarneralu nukittorsaaqataaffigissavaa.

Sullissinissamut inatsit § 83a naapertorlugu sungiusaqqittarneq

2015-imi inatsit nutaaq atuutilerpoq, pissutsinut arlalinnut atatillugu “ulluinnarsiutigalugu sungiusaqqittarnermik” taallugu.

Suliassaqaartitsiniarnermut atatillugu sungiusaqqinneq:

Suliffissaqaartitsiniarnermut politikki pillugu 2013-imi nukittorsaaqqinnermut inatsimmut ilanngunneqarpoq. Kommunit suliqaarfiit akimorlugit nukittorsaaqartunik pilersitsisussanngussapput inunnut napparsimasunut piginnaasakillissimasunullu suliffissaqaartitsiniarluni suliniuteqaarnermut atatillugu.

Nalunaarusiat makku innersuussutigineqarput:

- Sungiusaqqittarnermut pilersaarut aamma sungiusaqqittartut nukinik atuneq, nikerartumik suliffeqarneq, siusinaartumik soraarnerussutisiat il.il. pillugit nalunaarut.
- Peqqinnissaqaarfiup tungaatigut ilinniarsimasunit siunnersuineq aamma nukiit atorneqartut pillugit suliat naliliivigineqarneri, nekerartumik suliffeqarneq,

siusinaartumik soraarnerussutisiat il.il. pillugit kommunit nunallu immikkoortuisa suleqatigiinnissaat pillugu nalunaarut.

Sungiusaqqittarneq assersuutigalugu peqqinnissamut isumaqatigiissutit Naalagaaffiup nunallu immikkoortuisa akornanni isumaqatigiissutit aamma aalajangersarneqartartoq ingerlaqqilluni ataatsimiititaliamut paasisutissiissutigineqarpoq.

Danmarkimi napparsimasut pisariaqartitaat aallaavigalugit sungiusaqqittarneq nipaallisaanerlu akuerisaanikuupput. Pingaartumik kræftimut atatillugu sungiusaqqittarneq ineriartornermut sunniuteqarpoq. Taamaalilluni kræftimut tunngasutigut sungiusaqqittarneq nappaatinut allanut tunngasuni sungiusaqqinneqarnissamillu pisariaqartitsisunut pitsaasumik sunniuteqarsimavoq.

Qarasaasiakkut ungasianiit sungiusaqqittarneq aamma ineriartortoq nunatsinni qarasaasiakkut ungasianiit nakorsartitsisarneq ineriartorluarsimasoq sungiusaqqinnissamut neqerooruteqarnissamut tapertaasinnaasoq paasisassarsiorluni angalanermi aamma immikkut ataatsimiititaliamit maluginiarneqarpoq.

Nukipparujussuarnik atuiffiusarmat sungiusaqqinnermi ilaqutaasut akuutinneqartariaqarnerat pingaaruteqartoq ataatsimiititaliamit maluginiarneqarpoq. Taamatuttaaq pingaaruteqarpoq illoqarfinni tapertaasinnaasunik nukissalinnik peqaruni.

Maleruagassiornissamik suliaqarnissaq pillugu ataatsimiititaliap naliliinera:

Sungiusaqqittarnerup qanoq maleruagassiuunneqarnissaanut tunngatillugu siumut isigisumik politikikkut isumaliutersuuteqartoqarnera ataatsimiinnermi inernilunneqarpoq. Sungiusaqqittarnermut inatsit periarfissaavoq, inatsisilli atornissaanut pinngitsoorani atortariaqarani. Tunngaviatigut maleruagassanilu sungiusaqqittarneq pillugu maleruagassat ataasiakaat inatsimmi qulakkeerneqarnerisigut nalunaarusiornikkut maleruagassat ataqatigiinnerunissaat inatsisinut attuumassuteqartunut allannguutit ilanngunneqarnissaat qulakkeerneqassaaq. Sungiusaqqittarneq pillugu inatsisinut attuumassuteqartunut tunngasut tamarmik maleruagassiuunneqarnissaasa qanoq qulakkeerneqarsinnaanerit eqqarsaatinut ilaasariaqarput, tamannami ilinniartitaanermut, suliffeqarnermut, suliaqqartitsiniarnernut, isumaginninnermut tunngasunut aamma soorunami peqqinnissamut inatsimmut ilaammata. Kalaallit Nunaannut tunngatillugu **Qarasaasiakkut ungasianiit sungiusaqqinneq** atussallugu tulluarpoq.

Siunnersuummik matuminnga aappassaaneerinissamut pineqartup maleruagassiuunneqarnissaata qulakkeerneqarnissaa siunertaralugu Naalakkersuisut anguniakkatik pillugit ersarinnerusumik nalunaaruteqarnissaat ataatsimiititaliamit

ujartorneqarpoq. Naalakkersuisut siumut isigisumik suliniuteqarnissaannut nalunaarusiami inerniliussat ilanngulluarneqarsinnaapput.

Siunnersuutip aningaasatigut kingunerisassai

Siunnersuutip aningaasatigut allaffissornikkullu kingunerisassai ukioq ataaseq ukiullu affaata aappaa sinnernagu, nutserineq ilanngullugu AC-mik suliassat iliuusissat pilersaarutip sularineqarnera ingerlanneqarnissaa siunnersuuteqartumit naatsorsuutigineqartoq ataatsimiititaliamit tusaatissatut tiguneqarpoq.

Allannguutissat siunnersuut

Ataatsimiititaliap siunnersuummik minnerunngitsumillu sungiusaqqittarneq pillugu apeqqummik sularinninnerata kingunerisaanik suliassaqarfimmi periusissamik aalajangiisimannittoqarnissaanik pisariaqartitsisoqartoq ataatsimiititaliaq isumaqarpoq. Periusissaq salliutinneqartariaqartoq aammalu sungiusaqqittarneq pillugu aalajangersimasumik maleruagassiornermik malitseqartinneqartussa. Sungiusaqqittarnerup ataqatigiissumik ingerlanneqartarnissaa qulakkeerneqassaaq aammalu immikkut toqqakkat kisimik pinnatik innuttaasulli sungiusaqqinnissamik pisariaqartitsisut tamarmik qulakkeerneqassallutik. Periusissiassami pissutsit amerlasuut nalilersorneqartussaasut ataatsimiititaliamit ilisimaneqarpoq, taamaaliornikkut taanna nunatsinni pissutsinut naleqqussarneqarsinnaaqullugu. Illuatungaatigulli ataatsimiititaliamit ilisimaneqarpoq sungiusaqqittarnissamik apeqqut Naalakkersuisunit annertuumik aallunneqartoq, tamannalumi suliassaqarfik pillugu nassuiaatikkut kingullikkut uppersarneqarpoq. Naalakkersuisut saniatigut nunatsinni Peqqinnissaq pillugu Kattuffiit taassumalu ataani suliallit arlallit ataatsimiititaliamit ingerlaavartumik attavigineqarsimapput. Kingullermik nunatsinni sungiusaqqittarneq sungiusartarnerlu pillugit Peqqinnissaq pillugu Kattuffiit allakkiaat maj 2016-imi ataatsimiititaliamit tiguneqarpoq. Allakkiaq suli kalaallisuunngortinneqarsimannngimmat matumani ilanngunneqanngilaq. Suliassaqarfimmi nalaakkersuinikkut iliuuserineqartussat aningaasatigut sulisorisatigullu sinaakktissat periarfissallu pigineqartut imaluunniit piviusunngortinneqarsinnaasut aallaavigalugit piviusunngortinneqartariaqartut ataatsimiititaliap ilisimavaa, taamaaliornikkut naalakkersuinikkut anguniakkat piviusunngortinneqarsinnaaqullugit.

Taamaattumillu allannguutissat siunnersuummik imaattumik ataatsimiititaliaq saqqummiussivoq:

Sungiusaqqinnissamik tassungalu ilanngullugu sungiusarnissamik pisariaqartitsisunut tamanut siunnerfilimmik, aaqqissuulluakkamik ataqatigiissumillu ingerlatsinissamut peqataaqataasinnaasunik suliniutissanut periusissiassamik kingusinnerpaamik UKA 2016-imi saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

Ataatsimiititaliap inassuteqaatai

Ataatsimiititaliap allannguutissatut siunnersuutaa akuersissutigineqassasoq siunnersuutaaqqaartorlu itigartinneqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiisummilu oqaatigineqartunik paasinnilluni siunnersuut ataatsimiititaliap aappassaaniigassanngortippaa.

Tillie Martinussen
Siulittaasoq

Agathe Fontain

Jess Svane

Laura Tàunâjik

Ineqi Kielsen

Ane Hansen

Mimi Karlsen